

**Siunissami aalisarsinnaanermut akuersissutip aqutsisoqarfimmi ataasiinnarmi atorneqartalernissaa - taamatullu aqutsisoqarfiup "Kalaallit Nunaata sinnerata" siunissami aqutsivinnut immikkoortunut arfinilinnut aggornilersorneqarnissaa (Maniitsoq, Paa-miut, Qaanaaq, Sisimiut, Kalaallit Nunaata kujataa aamma Tasiilaq) anguniarlugu sinerissamut qanittumi qaleralinniarneq pillugu nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Michael Rosing, Demokraatit)

## **Akissuteqaat**

(Aalisarnermut Piniarnermullu Naalakkersuisoq)

### **1. Siullermeerera**

Naalakkersuisut siunnersuummut Inatsisartunut ilaasortamit Michael Rosingimit, Demokraatit, saqqummiunneqartumut qujaniarput.

Siunnersuuteqartumut siullermik naqqiissuteqalaassaanga, tassami sinerissap qanittuani qaleralinniarnermi aqutsiveqarfiit tallimanut avinneqarsimanerannik oqarneq eqqortuunngimmat. Sinerissap qanittuani qaleralinniarneq massakkut aqutsiveqarfinnut sisamanut Upernavimmut, Ummannamut, Qeqertarsuup Tunuanut aamma Kalaallit Nunaata sinneranut avinneqarsimapput. Nuuk aqutsiveqarfittut suli taaguuserneqanngilaq, tassami sinerissap qanittuani qaleralinniarneq pillugu Namminersorlutik Oqartussat nalunaarutissaattut siunnersuut suli akuersissutiqineqanngimmat.

Tamanna erseqqissareerlugu taava Nuummi aqutsiveqarfimmik nutaamik pilersitsisoqarnissaanik Naalakkersuisut pilersaaruteqarput, tassami ukiuni kingulliunerusuni aalisarfimmi tassani qaleralinnik aalisarneq annertusiartuinnarsimammat. Taamatut aalisarnerusoqaleraneranut pingaarnertut pissutaavoq Nuummi eqqaanilu tunitsivissaqarniarneq periarfissagissaarluarmat. Tamatumalu saniatigut Nuup eqqaani qaleraleqassutisip isumannaatsumik atuiffiginissaa qulakkeerniarlugu Nuummi eqqaanilu nammineq aqutsiveqalernissamik Kommuneqarfik Sermersooq kissaateqarsimavoq.

Nuup aqutsiveqarfiulerneratigut Nuup eqqaani aalisarneq immikkut aqunneqarsinnaalissaaq, taamaaliornikkullu najukkami tamaani sulisussaqaarniarneq eqqarsaatigalugu qalerallit tamaani illersorneqarsinnaassammata. Aqutsiveqarfimmik Nuummi pilersitsinikkut Nuup aqutsiveqarfianut aalisarsinnaanermut akuersissutinik immikkut ittunik tunniussisalernissaaq pisiaqalersussaavoq aqutsiveqarfimmi tassani qaleralinniarneq inuussutissarsiutigalugu ingerlanneqarsinnaassappat.

Sinerissap qanittuani qaleralinniarneq pillugu Namminersorlutik Oqartussat nalunaarutissaattut siunnersuut naapertorlugu Nuup aqutsiveqarfiani qaleralinniarnissamut immikkut pisassiissuteqarnissaaq aalajangersaaffigineqartussaavoq.

Piffissaaq ungasinnerusooq eqqarsaatigalugu aqutsiveqarfinnik arlalinnik pilersitsinikkut qaleralinniarnep ineriartorfiunerata malinnaavigisinnaanera Naalakkersuisut akuersaarpaat. Aqutsiveqarfiit arlalinnut avinnerisigut naleqqussakkamik aqutsiveqalersinnaaneq tunngavissinneqarsinnaavoq, taamaaliornikkullu angissutsit ineriartorfiunerat aalisakkanillu pisuussutit aalisartup tunisinerani paasissutissat pissarsiarineqartut malillugit malinnaaffigineqarsinnaallutik.

Nuup, Upernaviup, Uummannap Qeqertarsuullu Tunuata saniatigut aalisarfinni allani qalerallit aalisarneqarnerisa annertussutsimikkut annertugisassaanginnerat pillugu Naalakkersuisut isumaqarput, qaleralinnut aqutsiveqarfinnik allanik pilersitsissalluni pisariaqartinneqanngitsoq.

Naalakkersuisut isumaqarputtaaq aqutsiveqarfinnik allanik pilersitsisoqarnera sinerissap qanittuani qaleralinniarnermut eqaannerulersitsinaviangitsoq. Tamatumalu kingunerivaa – Naalakkersuisut aqutsiveqarfinnik allanik pilersitsisoqarnissaa pisariaqavinngitsutut isumaqarfigimmassuk - aqutsiveqarfiup "Kalaallit Nunaata sinnerata" immikkut aqutsiveqarfinnut arfinilinnut avinneqarnissaanik siunnersuut Naalakkersuisut tapersorsinnaangimmassuk.

Aalajangiiffigisassatut siunnersuummi immikkoortup aappaanut tunngatillugu oqaatigineqasaaq, soorlu assersuutigalugu aqutsiveqarfimmuq Qeqertarsuup Tunuanut aalisarsinnaanermut akuersissutit tunniunneqartut aqutsiveqarfinni Upernavimmi Uummannamilu atorqearsinnaassanngippata, tamanna aalisartut ataasiakkaat inuussutissarsiorsinnaanerannik killilersuinnermik kinguneqartussaammat. Aalisartut sinerissap qanittuani qaleralinniarnernuq inuussutissarsititut periarfissaqartitsineranik atorluaasinnaangippata tamanna tulluartsuussanngitsoq Naalakkersuisut isumaqarput.

Aalisarsinnaanermut akuersissutit killilersuiffiginissaanik pisariaqartitsisoqarneranik, assersuutigalugulu aqutsiveqarfimmi Qeqertarsuup Tunuani aalisarsinnaanermut akuersissutit tunniunneqartut aqutsiveqarfinni Upernavimmi Uummannamilu atorqearsinnaassannginneranik siunnersuuteqartoqarnera Naalakkersuisut isumaqatigisinnaanngilaat. Taamannak aqutseriaaseqarnissaaq atsikkutigiinngilaq pissutsinut aalisartut ataasiakkaat inuussutissarsiorsinnaanerisa killilersorneqarnerannik tamanna kinguneqassappat taamatut aqutsisoqarnissaa tulluartsutut isigineqanngilaq.

Malugineqasaaq Inatsisartut aalajangiiffigisassaattut siunnersuut aqutsiveqarfinnik amerlanernik aqutsinissamik kinguneqartitsissammat, tamannalu aningaasartuuteqarnerunermik kinguneqartussaammat.

Naggasiullugu Naalakkersuisut kissaatigalugu oqaatigissavaat aqutsiveqarfinni pingasuusuni Upernavimmi, Uummannami Qeqertarsuullu Tunuani taakkunani ataasiakkaani pisassiissutinit annerpaamik 10 procentit tikillugit aalisartunit aqutsiveqarfinnit avataaneersunit pisarineqarsinnaasutut qummut killileerusukkamik. Sinerissap qanittuani qaleralinniarneq pillugu Nalunaarummi atuuttumi aqutsiveqarfinni pingasuusuni ataasiakkaani Upernavimmi, Uummannami Qeqertarsuullu Tunuani aalisarsinnaanermut akuersissuteqartut aqutsiveqarfiit iluini tamani aalisarsinnaatitaapput. Aqutsiveqarfiit ataasiakkaat iluini pisassiissutitut aalajangiunneqartup 10 procentianik qummut killiliinikkut Upernavimmi, Uummannami Qeqertarsuullu Tunuani akuersissuteqartunit siunissami aalisarsinnaalernissaanik Naalakkersuisut kissaateqarput. Tamatuma aqutsiveqarfiit ataasiakkaat iluini aalisarnerup illersorneqarsinnaanissaanik annertusaaqataasaaq.

Tamatuma saniatigut Naalakkersuisut allatut killiliissuteqarnissamik kissaateqarput, tassa aalisarsinnaanermik akuersissutaatillit pissassiissutinik pigisaqartut killeqarfiit pisassiiffiunngitsut iluini aalisartarnerini, suli pisassaartoqartillugu aalisarneq ingerlanneqarpat pisarisat pisassarisanit ilanngaataasalernissaanik, aammalu aqutsiveqarfimmi aalisartut atassuteqaaqteqarfigisaani taamaallaat killeqarfiit pisassiiffiunngitsut iluini pisinnaalissalluni. Tamatumunnga atatillugu Naalakkersuisut kissaateqarput sinerissap qanittuani qaleralinniarneq pillugu Nalunaarummi allasimasup tassalu, killeqarfiit pisassiivunngitsut iluini aalisarsinnaanermut periarfissarititaasooq attatinneqarnissaa.

Taamatut oqaaseqarlunga siunnersuutigineqartoq itigartitsissutigineqarnissaanik innersuussivunga.